



ANTARKTIESE BULLETIN

Sponsored by—Onder beskerming van
BP South Africa (Pty.) Ltd.

JULY
to
DECEMBER

1968 — No. 26 —

JULIE
tot
DESEMBER



Published by the South African Antarctic Association
32 Park Avenue, Bordeaux, Randburg

Patrons/Beskermhere : Prof. S.P. Jackson, M.A., D.I.C., Ph.D.
Dr. S. Meiring Naude, M.Sc., Ph.D., D.Sc.h.c., L.L.D.h.c.
Mnr. D.J. Joubert, B.A. LL.B.

Uitgeeë deur die Suid-Afrikaanse Antarktiese Vereniging
Parklaan 32, Bordeaux, Randburg

Editor/Redakteur: D. G. Torr

REDAKSIONEEL — EDITORIAL

Die Suid-Afrikaanse Antarktiese Vereniging verwelkom Mnr. D.J. Joubert, Sekretaris van Vervoer, wat ingestem het om mede-beskermheer van die Vereniging saam met Prof. S.P. Jackson en Dr. S. Meiring Naudé te word.

Daniël Jacobus Joubert is gebore op 8 Februarie 1909 in die distrik Dundee, Natal, waar hy ook sy Laer- en Hoërskoolopleiding ontvang het. Gedurende die periode 1929 tot 1933 het Mnr. Joubert aan die Universiteit van Stellenbosch studeer en die graad B.A. en LL.B. behaal. Na sy universiteitsopleiding was hy vir 'n paar jaar klerk van die destydse Regter-President van die Transvaal.

Gedurende 1936 is Mnr. Joubert egter aangestel as Assistent-sekretaris van die destydse Sentrale Padvervoerraad vanwaar hy gevorder het tot Sekretaris van Vervoer in 1957. Mnr. Joubert is ook Voorsitter van die Raad vir Uitvoer van Bederfbare Produkte, van die Nasionale Vervoerkommissie, van die Raad van Trustees van die Sportstigting van Suid-Afrika. Verder is Mnr. Joubert ook President van die Federasie vir Jeug en Sport, asook 'n lid van die

Wetenskaplike Adviesraad van die Eerste Minister.

Mnr. Joubert is nog steeds die houer van verskeie skool-, interskool-, universiteits-, Dalrymple en Provinsiale rekords. Was sedert 1931 die houer van die Suid-Afrikaanse 100 tree rekord, naamlik 9.4 sekondes, maar hierdie rekord is onlangs deur Paul Nash verbeter. Die wêreldrekord wat hy in 1931 opgestel het, is eers in 1951 deur Mel Patton verbeter. Mnr. Joubert het in 1931 sowel as 1932 Springbokkleure verwerf. Tans speel Mnr. Joubert graag 'n putjie golf maar weens 'n baie druk program, kry hy maar selde die geleentheid daarvoor.

Mnr. Joubert het 'n intense belangstelling in boerdery en bring graag 'n besoekie aan sy plaas in die distrik van Warmbad, waar hy hoofsaaklik met beste boer.

Hy is getroud met Adeline du Toit en het drie kinders. Die twee oudstes, Danie en Liliëtte het die grade B.A. LL.B. en B.A. onderskeidelik aan die Universiteit van Pretoria verwerf en albei is reeds getroud. Die jongste, Mareliëse, is egter nog op skool aan die Hoër-Meisieskool, Pretoria.

SESDE JAARLIKSE DINEE VAN DIE VERENIGING

Die sesde jaarlikse dinee van die Suid-Afrikaanse Vereniging is in die Constanti klub, Pretoria, gehou op Saterdag-aand, 20 Julie 1968. Die W.K. Groblersaal was gevul met 80 gaste.

Die eregaste aanwesig was Prof. S.P. Jackson, Dr. en Mev. S.M. Naudé, Dr. en Mev. F.J. Hewitt, Mnr. en Mev. D. Neethling, Mnr. en Mev. K.A. Lee en Mnr. en Mev. O.E.F. Baker. Mnr. Lee en Baker is ampsdraers van BP Suidelike Afrika, skenker van die Suid-Afrikaanse Antarktiese Medaljé.

Verskonings is ontvang van Dr. Edna Plumstead van die Universiteit van die Witwatersrand en Prof. E.M. van Zinderen Bakker van die Universiteit van die Oranje Vrystaat. Ander vername persone wat die funksie bygewoon het was Prof. P. Stoker van die Universiteit van Potchefstroom en Mnr. D. Kingwill van die W.N.N.R. Dr. Charles Lautenbach het as seremoniemeester opgetree, 'n taak wat hy op besonder luimige wyse vervul het.

In sy openingswoorde het Mnr. D. Neethling, voorsitter van die Vereniging, 'n spesiale woord van verwelkoming ge-

rig aan Mnr. Joubert wat ingestem het om mede-beskermer van die Vereniging te word saam met Prof. Jackson en Dr. Naudé. Ongelukkig was dit nie moontlik vir Mnr. Joubert op die geleentheid aanwesig te wees nie en hy het sy verskoning aan die Vereniging oorgedra.

Die seremoniemeester het die volgende boodskap van Mnr. Danie Joubert, leier van SANAE 9 gelees: 'By geleentheid van midwinter 1968, dra die lede van negende Suid-Afrikaanse Nasionale Antarktiese Ekspedisie hulle beste wense oor aan die bestuur en lede van die S.A.A.V.'

Afgesien van die uitstekende ete wat voorgesit is, was die hoogtepunt van die aand die geleentheidstoespraak deur

Dr. Hewitt en die oorhandiging van die S.A. Antarktiese Medalje aan Mnr. Dirk Neethling. Dr. D. Torr, wat voorsitter van die Medalje-komitee was, het die motivering vir die toekenning van die medalje aan Mnr. Neethling voorgelees, waarna Mnr. Baker die medalje oorhandig het.

Dr. André van der Merwe het die geleentheid afgerond deur Dr. Hewitt te bedank vir sy interessante en leersame toespraak, en die ander persone wat behulpsaam was met die organisasie van die dinee geluk te wens met die uitstekende sukses van die geleentheid. Hy het verwys na die belangrike aanmoediging wat BP maak vir Antarktiese Navorsing deur 'n medalje beskikbaar te stel.

SITAAT: ANTARKTIKAMEDALJE



Mnr. O. Baker, Streeksbestuurder van BP Suidelike Afrika oorhandig die Antarktiese medalje aan Mnr. Dirk Neethling. Regs is Mev. Baker.

Foto: R. van Heerden

Die sitaat vir die toekenning van die medalje deur Dr. D.G. Torr, Voorsitter van die medaljekomitee van hierdie vereniging, was as volg :

Mnr. D.C. Neethling het die B.Sc. en B.Sc-Honneurs grade in Geologie aan die Universiteite van Stellenbosch (1954) en Pretoria (1966) behaal. Tans is hy ingeskryf vir die Doktors-graad aan die Universiteit van Natal. Sy proefskrif handel oor die Geologiese en Gletserkundige navorsing van die Suid-Afrikaanse Ekspedisies in Antarktika.

Voor sy vertrek in 1962 saam met die derde Ekspedisie na Antarktika was Mnr. Neethling reeds 'n erkende geoloog met wye ondervinding in Suid-Afrika en Noord en Suid-Rhodesië. Gedurende sy oorwintering te SANAE was hy verantwoordelik vir die uitvoering van die geologiese, gletserkundige en veldgeofisiese programme. 'n Taak wat hy met groot ywer en inisiatief aangepak en tot uitvoering gebring het. Die huidige langtermyn gletserkundige program te SANAE is hoofsaaklik aansy toedoen te danke.